



Godina XIV

Број/Број

Година XIV

Уторак, 28. просина/децембра 2010. године

108

Уторак, 28. децембра 2010. године

ISSN 1512-7494 - hrvatski jezik  
ISSN 1512-7508 - srpski jezik  
ISSN 1512-7486 - bosanski jezik

Na osnovu čl. 5. i 119. stav (1) Zakona o patentu ("Službeni glasnik BiH" broj 53/10), čl. 12. i 101. stav (2) Zakona o žigu ("Službeni glasnik BiH" broj 53/10), čl. 13. i 100. stav (2) Zakona o industrijskom dizajnu ("Službeni glasnik BiH" broj 53/10) i čl. 14. i 89. stav (2) Zakona o zaštiti oznaka geografskog porijekla ("Službeni glasnik BiH" broj 53/10), direktorica Instituta za intelektualno vlasništvo Bosne i Hercegovine d o n o s i

**ODLUKU**  
**O UVJETIMA ZA UPISIVANJE U REGISTRE PREDSTAVNIKA ZA ZAŠTITU INDUSTRIJSKOG**  
**VLASNIŠTVA KOJE VODI INSTITUT ZA INTELEKTUALNO VLASNIŠTVO BOSNE I**  
**HERCEGOVINE**

**I - OSNOVNE ODREDBE**

Član 1.  
(Predmet Odluke)

Ovom odlukom uređuju se uvjeti za upisivanje predstavnika u registre predstavnika koje vodi Institut za intelektualno vlasništvo Bosne i Hercegovine (u daljnjem tekstu: Institut) koji su ovlaštene za predstavljanje u postupcima stjecanja, održavanja, prometa i prestanka prava industrijskog vlasništva (u daljnjem tekstu: zaštita prava industrijskog vlasništva) propisanim Zakonom o patentu, Zakonom o žigu, Zakonom o industrijskom dizajnu, Zakonom o zaštiti oznaka geografskog porijekla i Zakonom o zaštiti topografije integriranih kola.

**II - PREDSTAVLJANJE PRED INSTITUTOM**

Član 2.  
(Predstavljanje pred Institutom)

- (1) Pravna i fizička lica koja se bave predstavljanjem u postupcima zaštite prava industrijskog vlasništva pred Institutom moraju biti upisana u odgovarajući registar predstavnika koji vodi Institut.
- (2) Strana pravna i fizička lica ostvaruju prava u postupcima pred Institutom samo posredstvom predstavnika koji su ovlaštene za predstavljanje i koji su upisani u odgovarajući registar koji vodi Institut.

### III - PREDSTAVNICI ZA ZAŠTITU INDUSTRIJSKOG VLASNIŠTVA

#### Član 3.

(Vrste predstavnika za zaštitu industrijskog vlasništva)

(1) U postupcima pred Institutom pravna i fizička lica (u daljnjem tekstu: stranke) mogu predstavljati patentni predstavnici i predstavnici za žigove, industrijski dizajn i oznake geografskog porijekla (u daljnjem tekstu: predstavnici za žigove).

(2) Patentni predstavnici predstavljaju stranke u svim postupcima zaštite prava industrijskog vlasništva propisanim Zakonom o patentu, Zakonom o žigu, Zakonom o industrijskom dizajnu, Zakonom o zaštiti oznaka geografskog porijekla i Zakonom o zaštiti topografije integriranih kola.

(3) Predstavnici za žigove predstavljaju stranke samo u postupcima u vezi sa zaštitom prava industrijskog vlasništva propisanim Zakonom o žigu, Zakonom o industrijskom dizajnu i Zakonom o zaštiti oznaka geografskog porijekla.

(4) Patentni predstavnici i predstavnici za žigove udružuju se u Komoru predstavnika za zaštitu industrijskog vlasništva.

#### Član 4.

(Patentni predstavnici)

Patentni predstavnik može biti:

1. lice koje je državljanin Bosne i Hercegovine i ima prebivalište u Bosni i Hercegovini, koje je diplomiralo na pravnom, tehničkom ili prirodoslovnom fakultetu u Bosni i Hercegovini ili u bivšoj SFRJ do 22. maja 1992. godine i koje je položilo stručni ispit za patentnog predstavnika pred Institutom. Lice koje je diplomiralo na naznačenim fakultetima u inozemstvu stječe uvjet iz ove tačke nakon nostrifikacije diplome od nadležnog organa;

2. advokat ili advokatsko društvo koji zapošljavaju najmanje jedno lice koje ispunjava uvjete iz tačke 1. ovog člana, ili sa takvim licem imaju zaključen ugovor;

3. pravno lice koje je registrirano u Bosni i Hercegovini, te koje zapošljava najmanje jedno lice koje ispunjava uvjete iz tačke 1. ovog člana, ili sa takvim licem ima zaključen ugovor.

#### Član 5.

(Predstavnici za žigove)

Predstavnik za žigove može biti:

1. lice koje je državljanin Bosne i Hercegovine i ima prebivalište u Bosni i Hercegovini, koje je diplomiralo na pravnom, tehničkom ili prirodoslovnom fakultetu u Bosni i Hercegovini ili u bivšoj SFRJ do 22. maja 1992. godine i koje je položilo stručni ispit za predstavnika za žigove, industrijski dizajn i oznake geografskog porijekla pred Institutom. Lice koje je diplomiralo na odgovarajućem fakultetu u inozemstvu stječe uvjet iz ove tačke nakon nostrifikacije diplome od nadležnog organa;

2. advokat ili advokatsko društvo;

3. pravno lice registrirano u Bosni i Hercegovini, koje zapošljava najmanje jedno lice koje ispunjava uvjete iz tačke 1. ovog člana, ili sa takvim licem ima zaključen ugovor.

Član 6.  
(Oslobađanje od polaganja stručnog ispita)

Bez polaganja stručnog ispita pred Institutom mogu se upisati u odgovarajući registar predstavnika lica koja imaju završen pravni, ekonomski, tehnički ili prirodoslovni fakultet i koja su radila najmanje tri godine na poslovima ispitivanja u postupcima zaštite prava industrijskog vlasništva u Institutu. O ispunjenju uvjeta iz ovog stava prilaže se odgovarajuća potvrda izdata od Instituta.

Član 7.  
(Pravo upisivanja u registre)

Pravo na upisivanje u registre predstavnika iz čl. 4. i 5. ove odluke imaju lica koja nisu osuđivana na kaznu zatvora za djela protiv ustavnog uređenja i sigurnosti, za krivična djela protiv čovječnosti i međunarodnog prava, protiv službene ili druge odgovorne dužnosti ili za drugo krivično djelo izvršeno iz koristoljublja ili drugih niskih pobuda osim ako je proteklo pet godina od izdržane, oprostene ili zastarjele kazne. Uvjet iz ovog stava dokazuje se uvjerenjem o nekažnjavanju izdatim od nadležnog organa.

#### **IV - REGISTRI PREDSTAVNIKA ZA ZAŠTITU INDUSTRIJSKOG VLASNIŠTVA**

Član 8.  
(Registri predstavnika za zaštitu industrijskog vlasništva)

- (1) Institut vodi registar patentnih predstavnika i registar predstavnika za žigove.
- (2) Za upisivanje u odgovarajući registar predstavnika podnosi se pisani zahtjev uz koji se prilažu odgovarajući dokazi o ispunjenju uvjeta iz čl. 4, 5, 6, odnosno 7. ove odluke.
- (3) Za upisivanje u odgovarajući registar predstavnika plaćaju se propisana administrativna taksa i posebni troškovi postupka.
- (4) Institut donosi rješenje o upisivanju u odgovarajući registar predstavnika, odnosno rješenje o odbijanju zahtjeva za upisivanje u registar predstavnika.
- (5) Protiv odluke Instituta o odbijanju zahtjeva za upisivanje u registar predstavnika stranka čijem zahtjevu nije udovoljeno ima pravo da podnese žalbu Komisiji za žalbe u roku od 15 dana od dana dostavljanja odluke.

Član 9.  
(Dokumenti koji se dostavljaju uz zahtjev)

- (1) Uz zahtjev za upisivanje u registar patentnih predstavnika dostavljaju se:
  - a) diploma o završenom fakultetu,
  - b) uvjerenje o državljanstvu,
  - c) potvrda o položenom stručnom ispitu za patentnog predstavnika,
  - d) dokaz o upisivanju u imenik advokata, odnosno upisivanju advokatskog društva u odgovarajući registar,
  - e) ugovor, odnosno dokaz o ispunjavanju uvjeta iz člana 4. tač. 2. i 3. ove odluke,
  - f) rješenje o upisivanju u sudski ili drugi odgovarajući registar,
  - g) uvjerenje o nekažnjavanju,
  - h) dokaz o uplati administrativne takse i posebnih troškova postupka.
- (2) Uz zahtjev za upisivanje u registar predstavnika za žigove dostavljaju se:
  - a) diploma o završenom fakultetu,
  - b) uvjerenje o državljanstvu,
  - c) potvrda o položenom stručnom ispitu predstavnika za žigove, industrijski dizajn i oznake geografskog porijekla,

- d) dokaz o upisivanju u imenik advokata, odnosno upisivanju advokatskog društva u odgovarajući registar,
- e) dokaz o ispunjavanju uvjeta iz člana 5. tačka 3. ove odluke,
- f) rješenje o upisivanju u sudski ili drugi odgovarajući registar,
- g) uvjerenje o nekažnjavanju,
- h) dokaz o uplati administrativne takse i posebnih troškova postupka.

#### Član 10.

(Ispisivanje i brisanje iz registra)

(1) Patentni predstavnik može zahtijevati ispisivanje iz registra patentnih predstavnika i upisivanje u registar predstavnika za žigove. Predstavnik za žigove može zahtijevati ispisivanje iz registra predstavnika za industrijski dizajn i žigove i upisivanje u registar patentnih predstavnika ukoliko dostavi dokaze o ispunjenju uvjeta iz člana 4. ove odluke. Uz zahtjev se prilaže i dokaz o uplati odgovarajućeg iznosa na ime administrativne takse i posebnih troškova postupka.

(2) Predstavnik se briše iz registra predstavnika:

- a) ako uloži pisani zahtjev za brisanje iz registra,
- b) ako mu je pravomoćnom sudskom odlukom zabranjeno bavljenje predstavljanjem,
- c) ako je predstavnik upisan kao fizičko lice, sa danom smrti tog lica,
- d) ako je predstavnik upisan kao pravno lice, brisanjem tog lica iz sudskog registra, odnosno drugog odgovarajućeg registra,
- e) ako je predstavnik upisan kao pravno lice, raskidom ugovora o angažiranju lica koje ispunjava uvjete za upisivanje pravnog lica u odgovarajući registar,
- f) ako je predstavnik advokat, pod uvjetima za prestanak prava na obavljanje advokatske djelatnosti,
- g) ako je predstavnik advokatsko društvo, brisanjem tog društva iz registra advokatskih društava,
- h) ako ne podnese zahtjev za obnavljanje upisivanja,
- i) ako je, prema odluci Suda časti Komore predstavnika za zaštitu prava industrijskog vlasništva, zbog kršenja pravila Komore postao nedostojan da obavlja poslove predstavljanja u postupku zaštite industrijskog vlasništva.

#### Član 11.

(Podaci koji se upisuju u registar)

(1) U registar patentnih predstavnika i registar predstavnika za žigove upisuju se:

- a) registarski broj predstavnika,
- b) podaci o predstavniku (ime i prezime, stručna sprema, zvanje, adresa, odnosno firma i sjedište pravnog lica, telefon, faks),
- c) datum upisivanja u registar predstavnika,
- d) podaci o licima koja ispunjavaju uvjete iz člana 4. tač. 2. i 3. i člana 5. tačka 3. ove odluke, odnosno licima koja su zaposlena kod predstavnika, ili sa njim imaju sačinjen ugovor (prezime i ime, adresa, stručna sprema, podaci o ugovoru).

(2) U registar patentnih predstavnika i registar predstavnika za žigove upisuje se promjena ličnih podataka o predstavniku, odnosno naziva i adrese, kao i promjena podataka o licima koja ispunjavaju uvjete iz člana 4. tač. 2. i 3. i člana 5. tačka 3. ove odluke. Podaci iz ovog stava upisuju se u odgovarajući registar na zahtjev predstavnika i uz uplaćivanje odgovarajućeg iznosa posebnih troškova postupka.

(3) Institut donosi rješenje o upisivanju promjene podataka u registar.

#### Član 12.

(Period važenja upisivanja i obnavljanje upisivanja)

(1) Predstavnik se upisuje u odgovarajući registar predstavnika na period od godinu dana.

(2) Upisivanje u odgovarajući registar predstavnika obnavlja se nakon godinu dana od dana upisivanja, odnosno od dana posljednjeg obnavljanja upisivanja u registar, sa mogućnošću neograničenog obnavljanja upisivanja.

(3) Uz zahtjev za obnavljanje upisivanja dostavljaju se dokazi o ispunjavanju uvjeta iz člana 4. tač. 2. i 3. i člana 5. tačka 3. ove odluke.

#### Član 13.

(Objavljivanje bibliografskih podataka)

(1) Bibliografski podaci o predstavnicima objavljuju se najmanje jedanput godišnje u "Službenom glasniku Instituta".

(2) Liste predstavnika sa bibliografskim podacima dostupne su zainteresiranim licima.

### V - STRUČNI ISPIT

#### Član 14.

(Stručni ispit)

(1) Stručni ispit iz čl. 4. i 5. ove odluke polaže se pred Institutom, na način i u skladu sa odredbama Pravilnika o polaganju stručnog ispita za predstavnike.

(2) Institut vodi registar lica koja su položila stručni ispit za patentne predstavnike i predstavnike za žigove.

(3) Za polaganje stručnog ispita plaćaju se posebni troškovi postupka.

### VI - PRIJELAZNE I ZAVRŠNE ODREDBE

#### Član 15.

(Status predstavnika koji su upisani u ranije registre)

(1) Rješenja prema kojima je izvršeno upisivanje predstavnika za zaštitu industrijskog vlasništva u registar patentnih predstavnika do stupanja na snagu ove odluke ostaju i dalje na snazi i na njih će se primjenjivati odredbe ove odluke.

(2) Predstavnici za zaštitu industrijskog vlasništva koji su na dan stupanja na snagu ove odluke upisani u registar predstavnika za industrijski dizajn i žigove upisat će se u registar predstavnika za žigove.

#### Član 16.

(Prestanak primjene ranijih propisa)

Danom stupanja na snagu ove odluke prestaje važiti Odluka o uvjetima za upisivanje u registre predstavnika za zaštitu industrijskog vlasništva koje vodi Institut za standarde, mjeriteljstvo i intelektualno vlasništvo Bosne i Hercegovine ("Službeni glasnik BiH" broj 7/03).

Član 17.  
(Stupanje na snagu)

Ova odluka stupa na snagu osmog dana od dana objavljivanja u "Službenom glasniku BiH".

Broj IP-13305/10-02ŠJ  
6. decembra 2010. godine  
Sarajevo

Direktorica  
Instituta za intelektualno vlasništvo  
Bosne i Hercegovine  
**Lidija Vignjević, v.r.**